

00393

欽定舊唐書

卷一百八十六下之一百九十中



欽定四庫全書

卷一百一十五

舊唐書卷一百八十六下

後晉司空同中書門下平章事劉陶撰

列傳第一百三十六

酷吏下

姚紹之

周利貞

王旭

吉溫

王鈞嚴安盧鉉附羅希夷

毛若虛

敬羽

裴昇畢曜附

姚紹之湖州武康人也解褐典儀累拜監察御史中宗朝武三思恃庶人勢駙馬都尉王同皎謀誅之事洩令紹之按問而誅同皎紹之初按問同皎張仲之祖延慶謀衣袖中發調弩射三思伺其便未果宋之遜以其外妹妻延慶曰今日將行何事而以妻爲之遜固抑而延慶且治其心矣之遜子曇密發之乃勅右臺大夫李承嘉與紹之按於新開門內初紹之將直盡其事詔宰相李嶠等對問諸相懼三思威權但僂俛佯不問仲之延慶言曰宰相中有附會三思者嶠與承嘉耳言復設誘紹之其事乃變遂密置人力十餘命引仲之對問至卽爲紹之所擒塞口反接送獄中紹之還謂仲之曰張三事不諧矣仲之固言三思反狀紹之命棒之而臂折大呼天者六七謂紹之曰反賊臂且折矣命已輸汝當訴爾於天帝因裂衫以束之乃自誣反而過誅紹之自此神氣自若朝廷側目累遷左臺侍御史奉使江左經汴州辱錄事叅

軍魏傳弓尋拜監察御史紹之後坐贓污詔傳弓按之獲贓五千餘貫以聞當坐死韋庶人妹保持之遂黜放爲嶺南瓊山尉傳弓初按紹之紹之在揚州色動謂長吏盧萬石曰頃辱傳弓今爲所按紹之死矣逃入西京爲萬年尉擒之擊折其足因授南陵令員外置開元十三年累轉括州長史同正員不預知州事死

周利貞神龍初爲侍御史附託權要爲桓彥範敬暉等五王嫉之出爲嘉州司馬時中書舍人崔湜與桓敬善武三思用事禁中彥範憂之託心腹於湜湜反露其計於三思爲三思所中盡流嶺南湜勸盡殺之以絕其歸望三思問誰可使者利貞卽湜之表兄因舉爲此行利貞至皆鳩殺之因擢爲左臺御史中丞先天元年爲廣州都督時湜爲中書令與僕射劉幽求不叶陷幽求徙于嶺表諷利貞殺之爲桂州都督王賁護之逗遛獲免無何玄宗正位利貞與薛季昶來之問同賜死於桂州驛

王旭太原祁人也曾祖珪貞觀初爲侍中尙永寧公主旭解褐鴻州叅軍轉兗州兵曹神龍元年正月張柬之桓彥範等誅張易之昌宗兄弟尊立孝和皇帝其兄昌儀先貶乾封尉旭斬之實其首赴于東都遷并州錄事叅軍唐隆元年玄宗誅韋庶人等并州長史周仁軌韋氏之黨有詔誅之旭不覆勅又斬其首馳赴西京開元二年累遷左臺侍御史時光祿少卿盧崇道以崔湜妻父貶於嶺外逃歸匿於東都爲御史

家所發詔旭究其獄旭欲擅其威權因捕崇道親黨數十人皆極其楚毒然後結成其罪崇道及三子並杖死於都亭驛門生親友皆決杖流貶時得罪多是知名之士四海冤之旭又與御史大夫李傑不叶遞相糺訐傑竟左遷衢州刺史旭既得志擅行威福由是朝廷畏而鄙之五年遷左司郎中常帶侍御史旭爲吏嚴苛左右無敢支梧每銜命推劾一見無不輸款者時宋王憲府掾紀希虬兄任劍南縣令被告有贓私旭使至蜀鞫之其妻美旭威逼之因奏決殺縣令納贓數千萬至六年希虬道奴詐爲祇承人受顧在臺事旭累月旭賞之召入宅中委以腹心其奴密記旭受饋遺囑託事乃成數千貫歸謁希虬希虬銜泣見憲敘以家冤憲憫之執其狀以奏詔付臺司劾之贓私累巨萬貶龍平尉憤恚而死甚爲時人之所慶快

吉溫天官侍郎瑒弟瑒之孽子也譎詭能諂事人遊於中貴門愛若親戚性禁害果於推劾天寶初爲新豐丞時太子文學薛巖承恩倖引溫入對玄宗目之而謂巖曰是一不良漢朕不要也時蕭冕爲河南尹河南府有事京臺差溫推詰事連冕堅執不捨賴冕與右相李林甫善抑而免之及溫選冕已爲京兆尹一唱萬年尉卽就其官人爲危之時驃騎高力士常止宿宮禁或時出外第冕必謁焉溫先馳與力士言謹甚洽握手呼行第冕觀之歎伏及他日溫謁冕於府庭遽布心腹曰他日不敢隳國家法今日已後洗

心事公晁復與盡歡會林甫與左相李適之駙馬張垧不叶適之兼兵部尙書垧兄均爲兵部侍郎林甫遣人許出兵部銓曹主簿事令史六十餘人僞濫事圖覆其官長詔出付京兆府與憲司對問數日竟不究其由晁使溫劾之溫於院中分囚於兩處溫於後廳佯取兩重囚訊之或杖或壓痛苦之聲所不忍聞卽云若存性命乞紙盡答令史輩素諳溫各自誣伏罪及溫引問無敢違者晷刻間事輯驗囚無拷訊決罰處常云若遇知己南山白額獸不足縛也會李林甫將起刑獄除不附己者乃引之於門與羅希夷同鍛鍊詔獄五載因中官納其外甥武敬一女爲盛王琦妃擢京兆府士曹時林甫專謀不利於東儲以左驍衛兵曹柳勣杜良娣妹壻令溫推之溫追著作郎王曾前右司禦率府倉曹王修己左武衛司戈盧寧左威衛騎曹徐徵同就臺鞠數日而獄成勣等杖死積屍於大理寺六載林甫又以戶部侍郎兼御史中丞楊慎矜違忤其旨御史中丞王鉷與慎矜親而嫉之同構其事云蓄圖讖以己是隋煬帝子孫闕於興復林甫又奏付溫鞠焉慎矜下獄繫之使溫於東京收捕其兄少府小監慎餘弟洛陽令慎名於汝州捕其門客史敬忠敬忠頗有學嘗與朝貴遊蹉跎不進與溫父瑁情契甚密溫孩孺時敬忠嘗抱撫之溫令河南丞姚開就擒之鎖其頸布袂蒙面以見溫溫驅之於前不交一言欲及京使典誘之云楊慎矜今款招已成須子一辨若解人意必活忤之必死敬忠迴首曰七郎乞一紙溫佯不與見詞懇乃於桑下令答



三紙辯皆符溫旨喜曰丈人莫相怪遂徐下拜及至溫湯始鞠慎矜以敬忠詞爲證及再搜其家不得圖識林甫恐事洩危之乃使御史盧鉉入搜鉉乃袖識書而入於隱僻中詬而出曰逆賊牢藏祕記今得之矣指於慎矜小妻韓珠團婢見舉家惶懼且行捶擊誰敢忤焉獄乃成慎矜兄弟賜死溫自是威振衣冠不敢偶言溫早以嚴毒聞頻知詔獄忍行枉濫推事未訊問已作奏狀計贓數及被引問便懼攝卽隨意而書無敢惜其生者因不加拷擊獄成矣林甫深以溫爲能擢戶部郎中常帶御史林甫雖倚以爪牙溫又見安祿山受主恩驍騎高力士居中用事皆附會其間結爲兄弟常謂祿山曰李右相雖觀察人事親於三兄必不以兄爲宰相溫雖被驅使必不超擢若三兄奏溫爲相卽奏兄堪大任擠出林甫是兩人必爲相矣祿山悅之時祿山承恩無敵驟言溫能玄宗亦忘曩歲之語十載祿山加河東節度因奏溫爲河東節度副使并知節度營田及管內採訪監察留後事其載又加兼鴈門太守仍知安邊郡鑄錢事賜紫金魚袋及丁所生憂祿山又奏起復爲本官尋復奏爲魏郡太守兼侍御史楊國忠入相素與溫交通追入爲御史中丞仍充京畿關內採訪處置使溫於范陽辭祿山令累路館驛作白紬帳以候之又令男慶緒出界送擺馬出驛數十步及至西京朝廷動靜輒報祿山信宿而達十三載正月祿山入朝拜左僕射充閑廐使因奏加溫戶部侍郎兼御史中丞充閑廐苑內營田五坊等副使時楊國忠與祿山嫌隙已成

溫轉厚於祿山國忠又忌之其冬河東太守韋陟入奏於華清宮陟自謂失職託於溫結歡於祿山廣載河東土物饋於溫又及權貴國忠諷評事吳豸之使鄉人告之召付中書門下對法官鞫之陟伏其狀貶桂嶺尉溫豐陽長史溫判官員錫新興尉明年溫又坐贓七千匹及奪人口馬奸穢事發貶端州高要尉溫至嶺外遷延不進依於張博濟止於始安郡八月遣大理司直蔣沈鞫之溫死於獄中博濟及始安太守羅希夷死於州門初溫之貶斥玄宗在華清宮謂朝臣曰吉溫是酷吏子姪朕被人誑惑用之至此屢勸朕起刑獄以作威福朕不受其言今去矣卿等皆可安枕也初開元九年有王鈞爲洛陽尉十八年有嚴安之爲河南丞皆性毒虐管罰人畏其不死皆杖詔不放起須其腫憤徐乃重杖之懊血流地苦楚欲死鈞與安之始眉目喜暢故人吏懼溫則售身權貴噬螫衣冠來頗異耳溫九月死始興十一月祿山起兵作亂人謂與溫報讎耳祿山入洛陽城卽僞位玄宗幸蜀後祿山求得溫一子纔六七歲授河南府叅軍給與財帛初溫之按楊慎矜侍御史盧鉉同其事鉉初爲御史作韋堅判官及堅爲李林甫所嫉鉉以堅款曲發於林甫冀售其身及按慎矜鉉先與張瑄同臺情旨素厚貴取媚於權臣誣瑄與楊慎矜共解圖讖持之爲驢駒板概以成其獄又爲王鉷閑廐判官鉷緣邢綽事朝堂被推鉉證云大夫將白帖索鹿馬五百匹以助逆我不與之鉷死在晷刻鉉忍誣之衆咸怒恨焉及被貶爲廬江長史在郡忽見瑄爲



崇乃雲端公何得來乞命不自由鉉須臾而卒

羅希夷本杭州人也近家洛陽鴻臚少卿張博濟堂外甥爲吏持法深刻天寶初右相李林甫引與吉溫持獄又與希夷姻婭自御史臺主簿再遷殿中侍御史自韋堅皇甫惟明李適之柳勣裴敦復李邕鄔元昌楊慎矜趙奉璋下獄事皆與溫鍛鍊故時稱羅鉗吉網惡其深刻也八載除刑部員外轉郎中十一載李林甫卒出爲中部始安二太守仍充當管經略使十四載以張博濟吉溫韋陟韋誠奢李從一員錫等流貶皆於始安希夷或令假攝右相楊國忠奏遣司直蔣沈往按之復令張光奇替爲始安太守仍降勅曰前始安郡太守充當管經略使羅希夷幸此資序叨居牧守地列要荒人多竄殛尤加委任冀絕姦訛翻乃囁結遁逃羣聚不逞應是流貶公然安置或差攝郡縣割剝黎氓或輟借館宇侵擾人吏不唯輕侮典憲實亦隳壞紀綱擢髮數僇豈多其事可貶海東郡海康尉員外置張博濟往託回邪跡惟憑恃嘗自抵犯又坐親姻前後貶官歲月頗久逗留不赴情狀難容及命按舉仍更潛匿亡命追刑莫斯爲甚並當切害合峻常刑宜於所在各決重杖六十使夫爲政之士克守章程負罪之人期於峻革凡厥在位宜各悉心時員錫李從一韋誠奢吉承恩並決杖遣司直宇文審往監之

毛若虛絳州太平人也眉毛覆於眼其性殘忍初爲蜀川縣尉使司以推勾見任天寶末爲武功丞年已

六十餘矣肅宗收兩京除監察御史審國用不足上策徵剝財貨有潤於公者日有進奉漸見任用稱旨每推一人未鞫卽先收其家資以定贓數不滿望卽攤徵鄉里近親峻其威權人皆懼死輸納不差暑刻乾元二年鳳翔府七坊押官先行剽劫州縣不能制因有劫殺事縣尉謝夷甫因衆怒遂撈殺之其妻訴於李輔國輔國奏請御史孫瑩鞫之瑩不能正其事又令中丞崔伯陽三司使雜訊之又不證成其罪因令若虛推之遂歸罪於夷甫伯陽與之言若虛頗不遜伯陽數讓之若虛馳謁告急肅宗曰卿且出對曰臣出卽死矣肅宗潛留若虛簾內召伯陽至伯陽頗短若虛上怒叱出之因流貶伯陽同推官十餘人皆於嶺外遠惡處宰相李峴以左右於瑩等亦被貶斥於是若虛威震朝列公卿懾懼矣尋擢爲御史中丞上元元年貶賓化尉而死

敬羽寶鼎人也父昭道開元初爲監察御史羽貌寢而性便僻善候人意旨天寶九載爲康成縣尉安思順爲朔方節度使引在幕下及肅宗於靈武卽大位羽尋擢爲監察御史以苛刻徵剝求進及收兩京後轉見委任作大枷有魴尾榆著卽悶絕又臥囚於地以門關輾其腹號爲肉餠飪掘地爲坑實以棘刺以敗席覆上領囚臨坑訊之必墜其中萬刺攢之又捕逐錢貨不減毛若虛上元中擢爲御史中丞太子少傅宗正卿鄒國公李遵爲宗子通事舍人李若冰告其贓私詔羽按之羽延遵各危坐於小牀羽小瘦遵

豐碩頃間卽倒請垂足羽曰尙書下獄是因羽禮延坐何得慢耶遵絕倒者數四請問羽徐應之授紙筆書賊數千貫奏之肅宗以勳舊捨之但停宗正卿及嗣薛王珍潛謀不軌詔羽鞫之羽召支黨羅於廷索勛尾榆枷之布拷訊之具以繞之信宿成獄珍坐死右衛將軍竇如玢試都水使者崔昌等九人並斬太子洗馬趙非熊陳王府長史陳閔楚州司馬張昂左武衛兵曹參軍焦自榮前鳳翔府郿縣主簿李昌廣文館進士張夏等六人決殺駙馬都尉薛履謙賜自盡左散騎常侍張鎬貶辰州司戶胡人康謙善賈資產億萬計楊國忠爲相授安南都護至德中爲試鴻臚卿專知山南東路驛人嫉之告其陰通史朝義謙髭鬚長三尺過帶按之兩宿鬢髮皆禿膝踝亦桮碎視之者以爲鬼物非人類也乞捨其生以後送狀奏殺之沒其資產羽與毛若虛在臺五六年間臺中囚繫不絕又有裴昇畢曜同爲御史皆酷毒人之陋刑當時有毛敬裴畢之稱裴畢尋又流黔中羽寶應元年貶爲道州刺史尋有詔殺之羽聞之衣凶服南奔溪洞爲吏所擒臨刑袖中執州縣官吏犯贓私狀數紙曰有人通此狀恨不得推究其事主州政者無宜寢也

贊曰王德將衰政在姦臣鷹犬搏擊縱之者人遭其毒螫可爲悲辛作法爲害延濫不仁

舊唐書卷一百八十六下

舊唐書卷一百八十七上

後 晉 司空 中書門下 平章事 劉昫撰

列傳第一百三十七

忠義上

夏侯端

劉威

常達

羅士信

呂子臧

張道源

族子楚金附

李公逸

張善相

李玄通

敬君弘

馮立

謝叔方

王義方

成三郎

尹元貞

高叡

子仲舒崔琳附

王同皎

周憬附

蘇安恒

俞文俊

王求禮

燕欽融

郎岌附

安金藏

語曰無求生以害仁有殺身以成仁孟軻曰生亦我所欲義亦我所欲捨生而取義可也古之德行君子動必由禮守之以仁造次顛沛不愆于素有若仲由之結纓鉏鋺之觸樹紀信之蹈火豫讓之斬衣此所謂殺身成仁臨難不苟者也然受刑一代顧瞻七族不犯難者有終身之利隨市道者獲當世之榮苟非氣義不羣貞剛絕俗安能碎所重之支體徇他人之義哉則由廩信讓之徒君人者常宜血祀況自有其臣乎卽如安金藏剖腹以明皇嗣段秀實挺笏而擊元兇張巡姚閭之守城杲卿真卿之罵賊又愈於金

藏秀實等各見本傳今採夏侯端李愷已下附于此篇

夏侯端壽州壽春人梁尚書左僕射詳之孫也仕隋爲大理司直高祖龍潛時與其結交大業中高祖帥師於河東討捕迺請端爲副時煬帝幸江都盜賊日滋端頗知玄象善相人說高祖曰金玉牀搖動此帝座不安參墟得歲必有真人起於寶沆之次天下方亂能安之者其在明公但主上曉察情多猜忍切忌諸李强者先誅全才旣死明公豈非其次若早爲計則應天福不然者則誅矣高祖深然其言及義師起端在河東爲吏所捕送于長安囚之高祖入京城釋之引入臥內與語極歡授秘書監屬李密爲王世充所破以衆來降關東之地未有所屬端固請往招諭之乃加大將軍持節爲河南道招慰使至黎陽李勣發兵送之自澶水濟河傳檄郡縣東至于海南至于淮二十餘州並遣使送款行次譙州會亳州刺史丁叔則及汴州刺史王要漢並以所部降於世充路遂隔絕端素得衆心所從二千人雖糧盡不忍委去端知事必不濟乃坐澤中盡殺私馬以會軍士因獻歎曰今王師已敗諸處並沒卿等土壤悉皆從僞特以共事之情未能見委然我奉王命不可從卿有妻子無宜効我可斬吾首持歸於賊必獲富貴衆皆流涕端又曰卿不忍見殺吾當自刎衆士抱持之皆曰公於唐家非有親屬但以忠義之故不辭於死諸人與公共事經涉艱危豈有害公而取富貴復與同進潛行五日餒死者十三四又爲賊所擊奔潰相失者大



半端唯與三十餘人東走採生螢豆而食之猶持節與之俱臥起謂衆人曰平生不知死地乃在此中我受國恩所以然耳今卿等何乃相伴死乎可散投賊猶全性命吾當抱此一節與之俱殞衆又不去屬李公逸爲唐守杞州聞而勒兵迎館之于時河南之地皆入世充唯公逸感端之義獨堅守不下世充遣使召端解衣遺之禮甚厚仍送除書以端爲淮南郡公吏部尙書端對其使者曰夏侯端天子大使豈受王世充之官自非斬我頭將往見汝何容身苟活而屈於賊乎遂焚其書拔刀斬其所遺衣服因發路西歸解節旄懷之取竿加刃從間道得至宜陽初山中險峻先無蹊徑但冒履榛梗晝夜兼行從者三十二人或墜崖溺水遇猛獸而死又半其餘至者皆鬚髮禿落形貌枯瘠端馳驛奉見但謝無功殊不自言艱苦高祖憫之復以爲秘書監俄出爲梓州刺史所得料錢皆散施孤寡貞觀元年病卒

劉感岐州鳳泉人後魏司徒高昌王豐生之孫也武德初以驃騎將軍鎮涇州薛仁杲率衆圍之感嬰城拒守城中糧盡遂殺所乘馬以分將士感一無所噉唯煮馬骨取汁和木屑食之城垂陷者數矣長平王叔良援兵至仁杲解圍而去感與叔良出戰爲賊所擒仁杲復圍涇州令感語城中云援軍已敗徒守孤城何益也宜早出降以全家室感許之及至城下大呼曰逆賊飢餓亡在朝夕秦王率數十萬衆四面俱集城中勿憂各宜勉以全忠節仁杲大怒執感於城邊埋脚至膝馳騎射殺之至死聲色逾厲賊平高祖

購得其屍祭以少牢贈瀛州刺史封平原郡公諡曰忠壯令其子襲官爵并賜田宅

常達陝人也初仕隋爲鷹揚郎將數從高祖征伐甚蒙親待及義兵起達在霍邑從宋老生來拒戰老生敗達懼自匿不出高祖謂達已死令人闔屍求之及達奉見高祖大悅以爲統軍武德初拜隴州刺史時薛舉屢攻之不能尅乃遣其將仵士政以數百人僞降達達不之測厚加撫接士政伺隙以其徒劫達擁城中二千人而叛率達以見於舉達詞色抗厲不爲之屈舉指其妻謂達曰識皇后否達曰正是孀老嫗何足可識竟釋之有賊帥張貴謂達曰汝識我否荅曰汝逃死奴瞋目視之貴怒拔刀將斫達人救之獲免及仁杲平高祖見達謂曰卿之忠節便可求之古人命起居舍人令狐德棻曰劉感常達須載之史策也執仵士政撲殺之賜達布帛三百段復拜隴州刺史卒

羅士信齊州歷城人也大業中長白山賊王薄左才相孟讓來寇齊郡通守張須陁率兵討擊士信年始十四固請自効須陁謂曰汝形容未勝衣甲何可入陣士信怒重著二甲左右雙鞭而上馬須陁壯而從之擊賊灘水之上陣纔列士信馳至賊所刺倒數人斬一人首擲於空中用槍承之戴以略陣賊衆愕然無攻逼者須陁因而奮擊賊衆大潰士信逐北每殺一人輒剗其鼻而懷之及還則驗鼻以表殺賊之多少也須陁甚加歎賞以所乘馬遺之引置左右每戰須陁先登士信爲副煬帝遣使慰喻之又令畫工寫

須陀士信戰陣之圖上于內史及須陁爲李密所殺士信隨裴仁基率衆歸于密署爲總管使統所部隨密擊王世充敗士信躍馬突進身中數矢乃陷於世充軍世充知其驍勇厚禮之與同寢食後世充破李密得密將酈元真等盡拜爲將軍不復專重之士信恥與爲伍率所部千餘人奔于穀州高祖以爲陝州道行軍總管使圖世充及大軍至洛陽士信以兵圍世充于金堡中有大罵之者士信怒夜遣百餘人將嬰兒數十至于堡下詐言從東都來投羅總管因令嬰兒啼噪旣而佯驚曰此千金堡吾輩錯矣忽然而去堡中謂是東都逃人遽出兵追之士信伏兵於路俟其開門奮擊大破之殺無遺類世充平擢授絳州總管封剋國公尋從太宗擊劉黑闥於河北有洛水人以城來降遣士信入城據守賊悉衆攻之甚急遇雨雪大軍不得救經數日城陷爲賊所擒黑闥聞其勇意欲活之士信詞色不屈遂遇害年二十太宗聞而傷惜購得其屍葬之謚曰勇士信初爲裴仁基所禮嘗感其知己之恩及東都平遂以家財收斂葬於北邙又云我死後當葬此墓側及卒果就仁基左而託葬焉

呂子臧蒲州河東人也大業末爲南陽郡丞高祖剋京師遣馬元規撫慰山南子臧堅守不下元規遣使諷諭之前後數輩皆爲子臧所殺及煬帝被殺高祖又遣其婿薛君倩賞手詔諭旨子臧乃爲煬帝發喪成禮而後歸國拜鄧州刺史封南陽郡公時朱粲新敗子臧率所部數千人與元規併力將擊之謂元規